

四庫全書

史部

欽定四庫全書

史部

欽定續文獻通考卷一百三十六

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷一百三十六

刑考

刑制

明太祖吳元年十月命中書省定律令

初帝以唐宋皆有成律斷獄惟元不做古制取一時
所行之事為條格胥吏易為奸弊自平武昌以來即
議定律至是命左丞相李善長參知政事楊憲傅瓛

御史中丞劉基翰林學士陶安等二十人詳定諭之
曰立法貴在簡當使言直理明人人易曉若條緒繁
多或一事而兩端可輕可重使奸貪之吏得以夤緣
為奸則所以禁殘暴者反以賊良善非良法也務求
適中以去煩弊卿等宜盡心參究凡刑名條目逐日
來上吾與卿等面議斟酌之庶可為久遠之法又謂
臺省官曰元時條格繁冗所以其害不勝且以七殺
言之謀殺故殺鬪毆殺皆死罪何用如此分析但誤

殺有可議者要之與戲殺過失殺亦大不相遠今立法正欲矯其舊弊歸於簡嚴簡則無出入之弊嚴則民知畏而不敢輕犯爾等其體此意每御西樓召諸議律官及儒臣皆賜坐講論以求至當十二月書成帝與廷臣復閱視之去煩就簡減重從輕凡為令一百四十五條吏令二十戶令二十四禮令十七兵令十一刑令七十一工令二律則準唐之舊而增損之計一百八十五條吏律十八戶律六十三禮律十四

兵律三十二刑律一百五十二律八命有司刊布中外

十二月作律令直解頒郡縣

時律令初行帝謂大理卿周楨等曰律令之設所以使人不犯法田野之民豈能悉曉其意有誤犯者赦之則廢法盡法則無民爾等前所定律令除禮樂制度錢糧選法之外凡民間所行事宜類聚成編直解其義頒之郡縣使民家喻戶曉焉

洪武元年八月令毋非時決囚

詔曰頃因戡亂以軍律用刑未為平允中書省宜重講究務從中典決重刑須待秋後毋非時以傷生意十二月置登聞鼓於午門外

三年六月詔自今武官有犯非請奏不得逮問

十四年二月又詔武官三品以上有犯者奏請得旨乃鞠之四品以下有犯所司就逮問定罪議功請旨裁決若文職有犯干涉武官三品以上者亦須奏請

毋擅問

四年十一月命自今官吏犯贓罪者無貸

初元末政弊仕進者多賂遺權貴邀買名爵下至州縣簿書小吏非財賂亦莫得而進及臨事輒蠹政鬻獄大為民害帝深知其弊故有是令

五年二月建申明亭

帝以田野之民不知禁令往往誤犯刑憲命有司於內外府州縣及鄉之里社皆立申明亭凡境內人民

有犯者書其過名榜於亭上使人有所懲戒

洪武十五年八月諭禮部曰天下郡邑申明亭書記犯罪者姓名昭示鄉里以勸善懲惡今有司概以雜犯小罪書之使善良一時過誤為終身之累雖欲改過自新其路無由爾等詳議之於是禮部議自今犯十惡奸盜詐偽干犯名義有傷風俗及犯賊至徒者書於亭其餘雜犯公私過誤非干風化者悉皆除之以開良民自新之路其有私毀亭

舍除所懸法令及塗抹姓名者監察御史按察司
官以時按視罪如律制曰可

六月定宣官禁令

凡內使於宮城內相詈罵者先發理屈笞五十後罵
理直者不坐其不服本管鈐束而抵罵者杖六十內
使罵奉御者杖六十罵門官監官者杖七十內使於
宮城內相鬪毆者先鬪理屈杖七十毆傷者加一等
後應理直而無傷者笞五十其有不服本管鈐束而

毆之者杖八十毆傷者加一等毆奉御者杖八十毆
門官監官者杖一百傷者各加一等其內使等有心
懷惡逆出不道之言者凌遲處死有知情而蔽之者
同罪知其事而不首者斬首者賞銀三百兩

作鐵榜誡公侯申明律令

畧曰朕起布衣賴股肱宣力平定天下論功行賞封為
公侯令傳子孫共享太平之福尚慮公侯之家奴僕
人等冒犯國典今以鐵榜申明律令除親屬別議外

凡奴僕一犯即用究治於爾家無所問敢有藏匿罪人者比同一死折罪其目有九一凡內外指揮千戶百戶鎮撫總旗小旗等不得私受公侯財物受者杖一百發海南充軍再犯處死公侯與者初再犯免罪附過三犯準免死一次奉命征討受者與者不在此限二凡公侯不得私役官軍違者初再犯免罪附過三犯準免死一次其官軍敢有便聽從者杖一百發海南充軍三凡公侯強佔官民山場湖泊茶園蘆蕩

及金銀銅錫鐵冶者初再犯免罪附過三犯准免死
一次四凡各衛官軍非出征之時不得輒於公侯門
首侍立聽候違者杖一百發烟瘴之地充軍五凡功
臣之家管莊人等不得倚勢在鄉欺毆人民違者刺
面劓鼻家產籍沒入官妻子徙置南寧其餘聽使之
人各杖一百及妻子皆發南寧充軍六凡功臣之家
屯田佃戶管莊幹辦火者奴僕及其親屬人等倚勢
凌民侵奪財產者並依倚勢欺毆人民律處斷七凡

公侯除賜定儀仗戶及佃田人戶已有名額報籍在官敢有私託門下隱蔽羌徭者斬八凡公侯之家倚恃權豪欺壓良善虛錢實契侵奪人田地房屋孳畜者初犯免罪附過再犯住支俸給一半三犯停其祿四犯與庶人同罪九凡功臣之家不得受諸人土田及朦朧投獻物業違者初犯免罪附過再犯住支俸給一半三犯停其祿四犯與庶人同罪

六年正月命廷臣坐咎罪得以俸贖

時工部尚書王肅坐法當笞太祖曰六卿貴重不宜以細故辱命以俸贖罪後羣臣墨誤許以俸贖始此臣等謹按太祖此令善矣後卒杖永嘉侯朱亮祖工部尚書夏祥子孫踵而行之廷杖幾為故事武宗正德中杖言事者舒芬等百四十六人死者十一人世宗嘉靖初以議大禮杖豐熙等百三十四人死者十六人中年刑法益峻雖大臣不免史言其四十餘年間杖殺朝士倍蓰前代公卿之辱自

古未有辱公卿猶可言也王振劉瑾魏忠賢之徒
疊起而得志率由於此蓋監杖用內官行杖用衛
卒士大夫既懸命其手則欲小人之不歸誠於彼
而君子之不觸其禍難矣志稱廷杖之制自太祖
始今考太祖三十餘年中實無明文創為此制又
以六年之詔証之尤信然則太祖特偶一為之而
不圖其後世之因而甚焉是故用法不可不慎以
為創自太祖則非也

八月更定親屬相容隱律

凡同居大功以上親及外祖父母外孫若孫之婦夫
之兄弟及兄弟妻若妾之父母女壻許相容隱或奴
婢為本使隱者皆勿論其小功以下相容隱減凡人
三等若無服之親姑姊妹夫妻之兄弟姑夫妻姪相
容隱者亦減二等犯謀反惡逆不用此律

九月命府州縣輕重獄囚即依律斷決不須轉發果有
違枉御史按察司究劾之

明初有司決獄笞五十者縣決之杖八十者州決之
一百者府決之其徒罪以上具獄送行省由是州縣
或受贓減重從輕省府或弄法加輕入重文移駁議
囚繫淹連至是命中書省御史臺定議令出天下便
之

臣等謹按罪無輕重州縣皆得專決一時雖便而
久必滋弊殊非慎刑之意考洪武實錄十六年四
月帝以八事頒布天下州縣內言凡民有犯笞杖

罪者縣自斷決具實以聞犯徒流罪者縣擬其罪
申州若府以達布政司定擬其有犯死罪者縣擬
其罪申州若府以達布政司達刑部定擬或准工
贖罪或奏聞遣官審決凡諸司獄訟當詳審按律
決遣毋得淹禁如此分別定擬最為允當可見州
縣專決之例當亦洞悉其弊故行之未十年旋即
更改也

十一月更定大明律

本紀作閏十一月頒定大明律係誤今從刑法志

先是帝既頒行律令又念倘有輕重失宜有乖中典
乃命儒臣同刑官共講唐律日進二十餘條親為斟酌
擇其可行者從之至是重命刑部尚書劉惟謙詳
定大明律篇目一準於唐曰禁衛曰職制曰戶婚曰
廢庫曰擅興曰盜賊曰鬪訟曰詐偽曰雜律曰捕亡
曰斷獄曰名例采用舊律二百八十八條續律百二
十八條舊令改律三十六條因事制律三十一條掇
唐律以補遺一百二十三條合六百有六條分為三

十卷其間損益務合輕重之宜每成一篇輒繕寫以進上命揭於兩廡之壁親加裁定及成頒行天下

邱濬曰有唐律例之外又有令格式宋初因之至神宗更其目曰勅令格式所謂勅者兼唐之律也洪武元年即為大明令頒行天下蓋與漢高祖初入關約法三章唐高祖入京師約法十二條同一意也至六年始命刑部尚書劉惟謙造律文又有洪武禮制諸司職掌之作與夫大誥三篇及大誥

武臣等諸書凡唐宋所謂律令格式與其編勅皆在是也但不用唐宋之舊名爾

九年十月命釐正大明律

帝覽律條猶有未當者命丞相胡惟庸御史大夫汪廣洋等詳議釐正者凡十有三條餘如故

十四年四月勅刑部自今官吏有犯宥罪復職榜示其過於門果能省身改過則除之不悛者論如律

十八年又命刑部錄內外諸司職官犯法罪狀明白

者揭於申明亭以示懲戒

十五年十月勅刑部申明越訴之禁

凡軍民訴戶婚田土作奸犯科諸事悉由本屬官司
自下而上陳告毋得越訴輒赴京師亦不許家居上
封事違者罪之

明史刑法志曰洪武末年小民多越訴京師及按
其事往往不實乃嚴越訴之禁命老人理一鄉詞
訟會里胥決之事重者始白於官然卒不能止越

訴者日多乃用重法戍之邊宣德時越訴得實者
免罪不實仍戍邊景泰中不問虛實皆發口外充
軍後不以為例也

詔自今有以繁文出入人罪者罪之仍命刑科會諸司
官定議成式榜示中外

時刑部尚書開濟奏曰凡事務從簡要今內外諸司
議刑奏劄動輒千萬言泛濫無紀失其本情苟非禁
革習以成弊帝曰虛詞失實浮文亂真朕甚厭之因

有是命

十七年十月定土官犯罪律

雲南布政司言土官犯罪律條無所依據乞加定議
上命六部官會議凡土官選用者有犯依流官律定
罪世襲者所司不許擅問先以干證之人推得其實
定議奏聞杖以下則紀錄在職徒流則徙之北平著
為令

二十一年二月命自今天下有司官凡入流品以上犯

罪者皆須奏聞方許逮問

二十二年八月更定大明律

先是刑部奏言比年律條增損不一在外理刑官及初入仕者不能盡知致令斷獄失當請編類頒行俾知遵守遂命翰林院同刑部官取比年所增者叅攷折衷以類編附舊律名例律附於斷獄下至是特載之篇首凡三十卷四百六十條名例一卷四十七條吏律二卷曰職制十五條曰公式十八條戶律七卷

曰戶役十五條曰田宅十一條曰婚姻十八條曰倉庫二十四條曰課程十九條曰錢債三條曰市廛五條禮律二卷曰祭祀六條曰儀制二十條兵律五卷曰宮衛十九條曰軍政二十條曰關津七條曰廩牧十二條曰郵驛十八條刑律十一卷曰賊盜二十八條曰人命二十條曰鬪毆二十二條曰罵詈八條曰訴訟十二條曰受贓十一條曰詐偽十二條曰犯姦十條曰雜犯十一條曰捕亡八條曰斷獄二十九條

工律二卷曰營造九條曰河防四條又為五刑之圖
二首圖五曰笞曰杖曰徒曰流曰死笞刑五自一十
至五十每十為一等加減杖刑五自六十至一百每
十為一等加減徒刑五徒一年杖六十年杖七
十二年杖八十二年杖九十二年杖一百每杖十
及徒半年為一等加減流刑三千里二千五百里
三千里皆杖一百每五百里為一等加減死刑二絞
斬徒流之外有充軍絞斬之外有凌遲皆非五刑之

正故圖不列次圖七曰笞曰杖曰訊杖曰枷曰杻曰索曰鐐笞大頭徑二分七釐小頭減一分杖大頭徑三分二釐小頭減如笞之數笞杖皆以荆條為之皆臀受訊杖大頭徑四分五釐小頭減如杖笞之數以荆條為之臀腿受笞杖訊皆長三尺五寸用官降式較勘毋以筋膠諸物裝釘枷自十五斤至二十五斤止刻其上為長短輕重之數長五尺五寸頭廣尺五寸杻長尺六寸厚一寸男子死罪者用之索鐵為之

以繫輕罪者其長一丈鐐鐵連環之以繫足徒者帶以輸作重三斤又為喪服之圖凡八族親有犯視服等差定刑之輕重其因禮以起義者養母繼母慈母皆服三年毆殺之與殺嫡母同罪兄弟妻皆服小功互為容隱者罪得遞減舅姑之服皆斬衰三年毆殺罵詈之者與夫毆殺罵詈之罪同姨之子舅之子姑之子皆總麻是曰表兄弟不得相為婚姻大惡十曰謀反曰謀大逆曰謀叛曰惡逆曰不道曰大不敬曰

不孝曰不睦曰不義曰內亂雖常赦不原貪墨贓六
曰監守盜曰常人盜曰竊盜曰枉法曰不枉法曰坐
贓當議者八曰議親曰議故曰議功曰議賢曰議能
曰議勤曰議貴曰議賓太祖諭太孫曰此書首列二
刑圖次列八禮圖者重禮也顧愚民無知若於本條
下即註寬恤之令必易而犯法故以廣大好生之意
總列名例律中善用法者會其意可也太孫請更定
五條以上太祖覽而善之太孫又請曰明刑所以弼

教凡與五倫相涉者宜皆屈法以申情乃命改定七十三條復諭之曰吾治亂世刑不得不重汝治平世刑自當輕所謂刑罰世輕世重也

葉良佩曰國家之法雖本於李唐之十一篇然或芟繁定舛因事續置大抵比舊增多十二三而祥德美意殆未易以言語殫述也姑舉其大者如以笞杖徒流絞斬定為五刑而鈇趾蠶室之制一切剷除以六曹分為類目而擅興廐庫等篇悉為裁

定代背篋以臀杖而斷無過百易黥面以刺臂而
法止賊盜他如見知嚴於逃叛故縱深於捕亡收
拏連坐之條獨於叛逆大不道者當之凡茲皆法
之至善者也至夫園土之制嫌於太重則貸之以
輸作嘉石之制嫌於太輕則罰之以荷校盜官藏
受贓枉法罪皆死又嫌於太重則著為雜犯之命
而聽其贖緩與輸作焉由杖徒一轉而入大辟嫌
於太疎則定議著為徙邊戍邊永戍之令不與同

中國其有冥頑不軌之民或情罪勿麗於法復許所司比議奏決以行曲而不苛平而難犯蓋肉刑雖亡而厥威故在象刑無事於復而欽恤之意未嘗不行乎其間也

孫承澤述明律制曰凡刑五服以定之九族以齊之六親以別之五刑以用之七具以差之十惡以誅之六賊以等之八議以貸之五則以贖之又曰以名例攝律條以準皆各其及即若括律詞義以

五服參情法以墨涅識盜賊宗人不即市官人不
即獄悼耄癯殘不即訊

二十四年七月禁罪人誣引良善

帝謂刑部尚書楊靖曰善與惡異趣廉者必不同貪
公者必不濟私然惡或誣善事雖或可白不免受辱
繼令犯法者不許誣引良善違者所誣雖輕亦坐以
重罪爾刑部其榜諭之

二十八年九月頒皇明祖訓禁用黥刺劓割之刑

諭曰朕起兵至今四十餘年灼見情偽懲創奸頑
或法外用刑本非常典後嗣止守律與大誥不許用
黥刺劓割閹割之刑臣下敢以請者置重典

三十年五月作大明律誥成

帝諭羣臣曰朕倣古為治明禮以導民定律以繩頑
刊著為令行之既久犯者猶衆故作大誥以示民使
知趨吉避凶之道古人謂刑為祥刑豈非欲民並生
於天地間哉然法在有司民不周知故命刑官取大

誥條目撮其要畧附載於律凡榜文禁例悉除之除
謀逆及律誥該載外其雜犯大小之罪悉依贖罪律
論斷編次成書刊布中外令天下知所遵守

大誥者太祖惠民徂元習狃私滅公戾日滋十八年
悉輯官民過犯條為大誥其目有十曰攬納戶曰安
保過付曰詭寄田糧曰民人經該不解物曰灑派拋
荒田土曰倚法為奸曰空引偷軍曰黥刺在逃曰官
吏長解賣囚曰褻中士夫不為君用其罪至抄劄次

年復為續編三編皆頒學宮以課士里置塾師教之
因有藏大誥者罪減等於時天下有誦讀大誥師生
來朝者十九萬餘人並賜鈔遣還自律誥出而大誥
所載諸峻令未嘗輕用其後罪人率援大誥以減等
亦不復論其有無矣

刑法志曰太祖之於律令也草創於吳元年更定
於洪武六年整齊於二十二年至三十年始頒示
天下日久而慮精一代法始定中外決獄一準三

十年所頒其洪武元年之令有律不載而具於令者法司得援以為証請於上而後行焉凡違令者罪答特旨臨時決罪不著為律令者不在此例有司輒引比律至罪有輕重者以故入論罪無正條則引律比附定擬罪名達部議定奏聞若輒斷決致罪有出入者以故失論大抵明律視唐簡核而寬厚不如宋至其惻隱之心散見各條可舉一以推也如罪應加者必贓滿數乃坐

如監守自盜贓至四十貫絞若

止三十九貫九十九文欠一文不坐也

加極於流三千里以次增重

終不得至死而減至流者自死而生無絞斬之

別

即唐律稱加就重條

稱日者以百刻稱年者以三百六十

日

如人命事限及各文書違限雖稍不及時刻仍不得以所限之年月科罪即唐律稱日以百刻

條

未老疾犯罪而事發於老疾以老疾論幼小犯

罪而事發於長大以幼小論

即唐律老小廢疾條

犯死罪非

常赦所不原而祖父母父母老無養者得奏聞取

上裁犯徒流者餘罪得收贖存留養親

即唐律罪非十惡條

功臣及五品以上官禁獄者許令親人入侍徒流者並聽隨行違者罪杖同居親屬有罪得互相容

隱

即唐律同居相容隱條

奴婢不得首主凡告人者告人祖

父不得指其子孫為証弟不証兄妻不証夫奴婢不証主文職責在奉法犯杖則不叙軍官至徒流以世功猶得擢用凡若此類或間採唐律或更立新制所謂原父子之親立君臣之義以權之者也

惠帝建文三年十二月詔中官奉使侵暴吏民者所在

繫治

四年九月

時成祖
已即位

定功臣死罪減祿例

免三死者初犯減其祿二之七再犯減其十之七三
犯盡奪免二死者初犯減十之五再犯盡奪免一死
者一犯盡奪

成祖永樂元年二月定誣告法

凡誣告三四人者杖一百徒三年五六人者杖一百
流三千里所誣重者從重論誣告十人以上者凌遲

處死梟首其鄉家屬遷化外

定監生犯罪律

都察院奏定監生犯公罪依律紀錄私罪當答者罰
厯事一年考謹勤者準厯事監生出身平常者再厯
一年覆考當杖者斷發充吏準吏員資格出身

二年十一月定奉天征討官罪

刑部奏奉天征討官有以罪繫獄者請論功定擬帝
曰刑賞者治天下之大法不以功掩過不以私廢公

此輩征討之功既酬以爵賞矣今有犯而不罪是縱惡也何以治天下其論如律

三年三月定職官等犯罪等差

大理寺等衙門奏會議文職官及中外旂校軍民人等凡犯偷盜官物毆罵本管官及尊長鬪毆傷人威逼人致死詐偽竊盜犯姦恩軍再犯冒名頂替上工守衛擅離汛地私賣及棄毀軍器從征違期誣告人則依律科斷其犯私渡關津臨時避難私和公事失

火犯夜私造斗斛秤尺失囚囑託公事求索取受財物牧養畜產不如法居喪嫁娶匿稅諸不應為而為一應註誤連累則免決記罪其有不應侵損於人等項及情犯重者臨時奏請從之

四年七月申嚴誹謗之禁

仁宗洪熙元年三月始弛此禁

臣等謹按永樂二年有典仗率軍卒往安慶採木道過民家縱軍強取民財民將訴於官典仗教軍

誣民為誹謗縛送刑部獄具以聞帝慮民受誣命
五府六部都察院共訊得其實遂釋民而抵官軍
罪夫以一夫受冤輒命多官雜治之可云辨釋無
辜矣然前此三年四月有錦衣衛校尉訐朝臣誹
謗時政者是年十月通政司引告有發人誹謗而
引其母為證者後五年五月山陽縣民丁珏訐其
鄉誹謗罪數十人珏遂擢為刑科給事中當時側
目重足之象亦可想見

十月申匿名文書之禁

五年五月申嚴中國人妻妾子女出境律

帝勅甘肅總兵官西寧侯宋晟曰近聞回回多買中國人妻妾子女出境律載買賣者皆處死宜嚴禁止之

八年七月申棄子不育禁

皇太子謂禮部尚書呂震曰人情相愛則祝以多男夫民庶者國家之祥也近聞京師愚民厭多男子往

往生輒棄而不育宜嚴行禁止有犯者兩鄰亦並罪之

十月令交趾仍前降刑名事例

交趾布政司言先頒降刑名事例交趾土人有雜犯死罪及徒流遷徙者發邱溫抵交趾充驛夫遞運夫雜犯死罪者服役終身徒流遷徙者各以所犯輕重為限官吏犯笞杖罪吏斷決還役官降用應解見任別叙及雜職於邊遠叙用者皆斷決還職今新例徒

流遷徙杖罪皆發北京為民種田先後例殊不一皇太子曰交趾遠在萬里外宜從先例令刑部移文知之

十六年十月下令京城凡盜馬者斬

十二月申嚴官吏犯贓之禁

初太祖重懲貪吏詔犯贓者無貸復勅刑部官吏受贓者並罪通賄之人徙其家於邊著為令日久法弛故復申飭之

十八年二月諭甘肅總兵官陝西行都司所屬軍士有犯笞杖徒流遷徙罪者就發本地極邊處瞭守烟墩其為事官以下犯罪者送京師

十九年七月嚴自宮之禁

後洪熙元年三月復申此禁諭刑部尚書金純等曰古人求忠臣於孝子今自宮以求用者苟圖一時富貴而絕其祖父母不顧尚有誠心事君者哉其罪之勿貸

仁宗洪熙元年十月定吏典犯罪等差

行在吏部郎中陳叔剛上言吏犯杖罪律斷決為民
近時吏胥謀欲去役則私約相許多以杖罷去乞命
法司定議於是尚書金純等議吏犯徒罪以上準工
滿日安置別郡死罪如律公罪附過若杖罪除坐累
註誤依律的決還役外其受枉法不枉法贓並詐取
人財考滿丁憂不赴部避役逃亡詐稱疾病者仍請
依永樂年間事例免杖發北京為民庶有所懲戒從

之繼復有廣西按察僉事王愷奏言近例在外諸司吏典犯笞杖罪俱贖鈔改撥奸猾之徒必有避易就難乘機作弊者請勅法司會議法司議請凡照刷諸司文卷事干遲錯若漏報卷籍官吏應公私笞罪及公杖罪者皆依律決罰還職役如錢糧埋沒刑名違枉有所規避者仍依律發遣從之

十一月詔法司凡軍匠犯竊盜者杖一百鎖項鉗足俾
常赴工

宣宗宣德元年五月定貴州土人斷罪例

雜犯死罪就彼役作終身徒流徙杖者依年限役之
應答者役五月應杖者役十月畢日釋放

三年八月令犯奸婦女照律用刑

監察御史鄭道寧言犯奸婦女律當去衣受刑以勵
風俗今法司亦聽納米贖罪其間無米輸納者拘繫
於獄益縱淫穢有傷風化乞治之如律從之

四年二月嚴不孝律

諭三法司凡犯不孝及烝父妾收兄弟之妻為妻一切敗倫傷化者在外有司毋擅斷決悉送京師如律鞠治若武官及其子弟有犯此者不許復職承襲永為定制孝宗弘治十一年四月南京燕山前衛千戶韓銳坐不養贍繼祖母及毀罵小功以下兄刑部擬贖杖還職為大理寺所駁因請申明條例今後武職凡奉養有缺須祖父母父母親告乃坐若子孫告祖父母父母例不行勘若不奉養繼祖母繼母及毆本

宗大功以上尊長小功尊屬並毆傷外祖父母及妻
之父母者俱行勘明白方許論罪其有縱容抑勒女
及妻妾並子孫之婦妾與人通奸及奸内外有服親
屬並典僱妻女者俱係敗倫傷化請依律問罪發原
籍為民帝從之

英宗正統元年正月嚴誣告反坐例

廣東左叅議黃翰言各處奸徒多以婦女殘疾老幼
誣告平民及反坐抵誣不過的決收贖以此得計倚

法為奸乞追坐壯丁庶消誣罔帝從之

二年九月令盜賊株連者勿捕

四川按察使龔鋌奏四川強盜繫三司者不下三百而翻異者半之未獲者倍之其間有構於虛詞牽於仇怨所徵贓仗又率民家常有器械不足據信往往情偽莫白又所犯大抵在永樂宣德時有正犯已死而後獲者無自質理所司嫌於出罪不敢為辯長年淹禁恐傷和氣乞勅廷臣會議或遣重臣四出審錄

可疑者釋之或編為卒伍戍於邊方其未獲及為已獲所連者俱如詔勿捕帝命行之

三年三月申明撫拾婦女之禁

刑部奏近者民訟多撫拾人妻妾幼女幸其所辱以快私忿請申明舊制凡民訐告宜量加責罰婦女非犯奸惡殺人及毀罵舅姑不孝等罪並毋提問從之十一月定義女為妾罪律

先是洪武十七年十二月以刑部尚書王惠迪言命

定義女犯奸之罪比同宗無服之親律加一等杖六十徒一年其女歸宗著為令至是民有收義女為妾者法司論奸大理寺評事王亮請行勘原賣與媒合人果係義女罪之如律若通房使女收為妾而立約明白兩相願者不治罪不離異從之

四年八月立妄援重律之禁

御史陳祚言法司論獄多違定律專務深刻如戶部侍郎吳璽舉淫行主事吳軌宜坐貢舉非其人罪乃

加以奏事有規避律斬及輒自經死獄官及卒之罪
明有遞減科乃援不應為事理重者概杖之夫原情
以定律祖宗防範至周而法司乃抑輕從重至此非
所以廣聖朝之仁厚也今後有妄援重律者請以變
亂成法罪之帝是其言為申警戒

五年六月立侵欺軍糧禁例

帝以內外軍官侵欺糧餉致軍士逃匿命所司議今
後尅減糧至五十石布至五十疋棉花至一百斤以

上者擬死罪官充軍立功總小旗充軍守哨五年滿
日還役其計賊四十貫以下者擬徒流罪官稱為事
官立功總小旗充軍守哨流罪四年徒罪照年限滿
日各復職役調邊衛差操從之

九月定盜採銀礦新例

為首者處斬從者發戍時雲南有犯者御史陳智以
在例前論徒帝命從新例

六年正月申明六品以下聽分巡御史等官取問律

陝西布政使郭堅言律載府州縣官有犯所轄上司
不得擅自勾問止許開具所犯奏聞其倉場庫局陰
陽醫學閹廐驛遞等衙門官犯罪俱不詳載所以各
處此等有犯間有徑行勾問又有具奏提問者請勅
法司議畫一遵守刑部議宜從布政司問給事中廖
莊言律載在外五品以上官有犯奏聞請旨六品以
下聽分巡御史按察司並分司取問則倉場庫局等
官自在其內而布政司不得擅問明矣帝從之至成

化時陝西巡撫項忠言祖制京外五品以上官有犯
奏聞不得擅勾問今巡按輒提問六品官甚乖律意
當聞於朝命御史按察司提問為是乃下部議從之
七月罷竊盜立牌額例

先是上封事者言竊盜多黥刺之刑不足懲創宜扁
其門曰竊盜之家朝議從之至是刑部侍郎何文淵
言竊盜初犯再犯俱刺字三犯者絞今又立牌額是
於律外加罪實傷治體帝命罷之

八年七月定竊盜遇赦之例

大理寺言律載竊盜初犯刺右臂再犯刺左臂三犯絞今竊盜遇赦再犯者咸坐以初犯或仍刺右臂或不刺請定為例章下三法司議刺右遇赦再犯者刺左刺左遇赦又犯者不刺立案赦後三犯者絞帝曰竊盜已刺遇赦再犯者依常例擬不論赦仍通具前後所犯以聞後憲宗時都御史李秉援舊例奏革既而南京盜王阿童五犯皆遇赦免帝聞之詔仍以赦

前後三犯為令至神宗時復議奏請改遣云

十三年六月定奸義男婦律

刑部尚書金濂奏洪永以來有論依奸子孫之婦應
斬者有論依奸妻前夫之女應徒者乞聖斷遵守三
法司奉詔議親男與義男情有親疎宜比奸妻前夫
之女徒罪科斷帝曰通奸者如議男與婦仍斷還本
宗強奸者處斬

臣等謹按刑志載十二年知縣陳敏政言民以後

妻所攜前夫之女為子婦及以所攜前夫之子為
壻者並依同父異母姊妹律減等科斷與此條均
為比律之最當者

十四年六月定生員犯罪等差

時有生員犯居喪娶妻及挾妓飲酒者例應充吏刑
部言生員無志讀書者往往故犯以求脫免請輕罪
充吏免追廩米若犯受贓奸盜冒籍科舉挾妓飲酒
居喪娶妻妾等罪者南北直隸發充兩京國子監膳

夫各布政司發充鄰近儒學齋夫膳夫滿日原籍為民廩膳仍追米從之

景帝景泰元年二月復義子女等不孝舊例

刑部郎中王概言舊例告義子義女義婦義孫妾子前妻前夫之子不孝者必審其四隣恐冤抑也其義子女又必驗其年歲如過房在十五歲前曾受鞠養則坐以不孝不然但以僱工人毆罵家長律坐之奉詔革例此不宜去從之

五年二月詔法司不許妄加叅語

大理寺少卿薛瑄言發擬罪囚多加叅語奏請變亂
律意刑罰失中請勅自今一依律令不許妄加叅語
從之

三月定遠人犯罪律

御史姚哲奏各省遇蠻夷人有犯若係真犯死罪依
律處決笞杖罪的決發還本部族徒流並雜犯死罪
乞照工匠樂戶及婦人犯罪律各決杖一百餘罪收

贖亦發還本部族收管從之

英宗天順五年二月戒法司凡錦衣衛所行事枉人者
許與辨理

時錦衣衛按弋陽王奠壘敗倫事虛帝因悟錦衣衛
按獄之枉召輔臣李賢諭之賢對曰誠如聖諭因言
武人粗豪又國爪牙即法司明知其枉內憚之不敢
辨乞特旨諭法司許有枉者辨理毋畏勢避嫌帝從
之

刑法志曰錦衣衛獄者世所稱詔獄也大祖時天下重罪逮京師者收繫獄中數更大獄多使斷治所誅殺為多後二十年悉焚錦衣衛刑具以囚送刑部審理成祖幸紀綱令復典詔獄其黨莊敬等緣借作奸數百千端久之族綱而錦衣典詔獄如故英宗時王振用指揮馬順流毒天下枷李時勉殺劉球皆順為之復辟後李賢極論官校提人之害會緝弋陽王敗倫事虛帝因申戒之而是時指

揮門達鎮撫遼果怙寵賢亦為羅織者數矣蓋自
紀綱誅其徒稍戢至正統時復張天順之末禍並
熾焉正德時衛使石文義與張綵表裏作威福時
稱為劉瑾左右翼熹宗時田爾耕許顯純為魏忠
賢義子拷楊漣左光斗輩坐贓比較立限嚴督之
兩日為一限輸金不中程者受全刑全刑者曰械
曰鐐曰棍曰拶曰夾棍五毒備具呼暑聲沸然血
肉潰爛宛轉求死不得顯純叱咤自若一夕令諸

囚分舍宿於是獄卒曰今夕有當辟挺者壁挺獄
中言死也明日連死光斗等次第皆鎖頭拉死每
一人死停數日葦蓆裏尸出牢戶蠱蛆腐體獄中
事秘其家人或不知死日莊烈帝禽戮逆黨寃死
家子弟望獄門稽顙哀號為文以祭帝聞之惻然
然帝好疑羣下王德化掌東廠以慘刻輔之吳孟
明掌衛印時有縱舍然觀望廠意不敢違而鎮撫
梁清宏喬可用朋比為惡凡縉紳之門必有數人

往來踪跡故常晏啟蚤闔無敢偶語旗校過門如
被大盜官為囊橐均分其利京城中奸細潛入傭
夫販子陰為流賊所遣無一舉發而高門富豪踞
踏無寧居其徒黠者恣行請托稍拂其意飛誣立
構摘竿牘片字株連至十數人肆虐極矣然其初
太祖皆嘗熟計而預防之而子孫卒以是亡國禍
始於成祖一念之私而其毒至十數世而未有已
至鎮撫司職理獄訟初止立一司與外衛等洪武

十五年添設北司而以軍匠諸職掌屬之南鎮撫
司於是北司專理詔獄然大獄經訊即送法司擬
罪未嘗具獄詞成化元年始令覆奏用叅語法司
並掣肘十四年增鑄北司印信一切刑獄毋闕白
本衛即衛所行下者亦徑自上請可否衛使無得
與聞故鎮撫職卑而其權日重世宗中年事多下
鎮撫鎮撫結內侍多巧中會大監崔文奸利事發
下刑部尋以中旨送鎮撫司尚書林俊言祖宗朝

以刑獄付法司事無大小皆聽平鞫自劉瑾錢寧
用事專任鎮撫司文致冤獄法紀大壞御史曹懷
亦諫曰朝廷專任一鎮撫法司可以空曹刑官為
冗員矣帝俱不聽萬厯中建言有忤及稅使者輒
下詔獄刑科給事中楊應文言監司守令及齊民
被逮者百五十餘人雖已打問未送法司獄禁森
嚴水火不入疫癘之氣充斥圉圉衛使駱思恭亦
言熟審歲舉俱在小滿前今二年不行鎮撫司監

犯且二百多拋瓦聲寃鎮撫司陸達亦言獄囚怨恨有持刀斷指者俱不報云

憲宗成化元年三月令獄囚者一依正律盡革所有條例

時遼東巡撫滕昭言大明律乃一代定法而決斷武臣獨舍律用例武臣益縱蕩不檢請一切用律詔從之武臣被黜降者騰口謗訕有司畏事奏革之四年二月命分別賭博輕重等差

時獲賭博者四十餘人命枷項示衆仍榜禁之已而
犯者復三十餘人有不勝苦至死者刑科給事中毛
宏等奏其中情犯亦有輕重怙終之徒固不足恤愚
民不知榜例一時誤犯致死可憫乞勅法司分為三
等帝從之

六年二月嚴劫盜梟首之例

刑科給事中白昂言凡盜處決例于其行劫所在梟
首示衆其在京城闕廂行劫則免然輦轂之下情犯

尤為深重亦須臾首于京城百里外衝要處示衆庶
令嚴知警部院議從之

三月申明登聞鼓之制

兵科給事中宮榮言近年鼓下詞狀不與覆奏辯理
致使冤抑控訴無所自後當與研審明白回奏不許
一概立案其直鼓官亦須詳看曾經他處具告不行
者方與封進從之

七年十二月禁革官司科罰

御史李賓等奏在外官司聽斷詞訟動輒罰人財物
始則暫寄官庫以欺人終則通同庫役以入己其用
計奸深有為預備稽考告訐之謀至假立文簿虛作
支銷者使不通行禁革則貪風愈盛末流之弊不可
勝言請今後官司于軍民詞訟悉依律問擬無許罰
物從之

十三年正月置西廠令官校刺事

初成祖起北平刺探宮中事多以建文帝左右為耳

目故即位後專倚宦官立東廠于東安門北令嬖昵者提督之緝訪謀逆妖言大奸惡等與錦衣衛均權勢至是時尚銘領東廠又別設西廠刺事以汪直督之所領緹騎倍東廠自京師及天下旁午偵事雖王府不免直中廢復用先後凡六年寃死者相屬勢遠出衛上會直數出邊監軍大學士萬安言京城衆口一詞皆以革去西廠為便伏望革罷官校悉回原衛帝從之尚銘專用事未幾亦黜後正德元年命邱聚

領東廠又設西廠以命谷大用皆劉瑾黨也兩廠爭用事遣邏卒刺事于是無賴子乘機為奸天下皆重足立瑾又改惜薪司外薪廠為辦事廠榮府舊倉地為內辦事廠自領之京師謂之內行廠雖東西廠皆在伺察中加酷烈焉且創例罪無輕重皆決杖永遠戍邊或枷項發遣枷重至百五十觔不數日輒死尚寶卿顧璿副使姚祥輩俱不免瀕死而後謫成御史柴文顯汪澄以微罪至凌遲官吏軍民非法死者數

千瑾誅西廠內行廠俱革獨東廠如故神宗萬厯初
馮保以司禮兼廠事建廠東上北門之北曰內廠而
以初建者為外廠及天啟時魏忠賢以秉筆領廠事
用衛使田爾耕鎮撫許顯純之徒專以酷虐鉗中外
而廠衛之毒極矣凡中官掌司禮監印者其屬稱之
曰宗主而督東廠者曰督主東廠之屬無專官掌刑
千戶一理刑百戶一亦謂之貼刑皆衛官其隸役悉
取給於衛最輕黠獍巧者乃撥充之役長曰檔頭專

主伺察其下番子數人為幹事京中亡命詎財挾讐
視幹事者為窟穴得一陰事由之以密白於檔頭檔
頭視其事亦先予之金事曰起數金曰買起數既得
事帥番子至所犯家左右坐曰打樁番子即突入執
訊之無有左證符牒賄如數徑去少不如意榜治之
名曰乾醪酒亦曰搬罾兒痛楚十倍官刑且授意使
牽有力者有力者予多金即無事或斬不予予不足
立聞上下鎮撫司獄立死矣每月旦廠役數百人掣

簽庭中分職官府其視中府諸處會審大獄北鎮撫
司考訊重犯者曰聽記他官府及各城門訪緝曰坐
記某官行某事某城門得某奸胥吏疏白坐記者上
之廠曰打事件至東華門雖夤夜投隙中以入即屏
人達至尊以故事無大小天子皆得聞之家人米鹽
猥事宮中或傳為笑謔上下惴惴無不畏打事件者
莊烈帝即位忠賢伏誅王體乾王永祚王德化等相
繼領廠事告密之風未嘗息而德化尤慘刻嘗傾閣

臣薛國觀陰事國觀由此死後因御史楊仁愿言緹騎不當遣帝乃諭東廠所緝止謀逆亂倫其作奸犯科自有司存不宜緝并戒錦衣校尉之橫索者然帝倚廠衛益甚至國亡乃已云

十四年九月定諱盜罪例

御史屠浦等奏饑荒之後盜賊竊發所司往往隱匿不報請議罰都察院議一二次不報者停俸三次者戴罪俱捕盜如故若四次以上者奏請降等叙用從

之

十五年閏十月命毀坊刻會定見行律條

巡撫王恕言在京書坊刊行大明律後有會定見行律一百八條不知何時會定者在內法官老於刑名必不依附恐流傳四方有誤新進之士乞以其板毀之於是法司會議自後斷罪悉依大明律并奏準見行事例有再稱會定律條比擬出入人罪者以故出入論仍行書坊將所刻本燒毀違者治罪從之

十九年十月

刑法志作弘治十三年

定竊盜三犯罪例

法司以南京有三犯竊盜計贓至滿百貫者該斬絞罪雖係雜犯其情頗重三犯前罪即累惡不悛之人不得依常例其不滿貫犯徒流以下罪者雖至三犯原情實輕宜特依常例治之議上著為令

孝宗弘治五年七月命刪定問刑條例

刑部尚書彭韶等以鴻臚卿李燧之請議選屬官彙萃前後奏准事例分類編輯會官裁定成書通行內

外帝從之

六年五月令審錄錯誤者以失出入人論罪其受賄及任已見者以故出入人論罪

從御史翟瑄請也

閏五月定拷訊致死之罪

時以久旱求言太常卿李東陽因奏五刑最輕者笞杖然杖有分寸數有多寡今在外諸司笞杖之罪往往致死縱令事覺不過以因公還職以極輕之刑置

之不可復生之地多者數十甚者數百積骸滿獄流血塗地可為傷心律故勘平人者抵命刑具非法者除名偶不出此便謂之公一以公名雖多無害此則情重而律輕者不可以不議也請凡考訊輕罪即時致死累二十或三十人以上本律外仍議行降調或病死不實者并治其醫命下所司議處

十一年正月定親屬相姦罪例

時陝西宜川縣民馮子名兄亡妻其嫂法司議以逆

天道壞人倫擬絞仍通行中外有犯此類及親屬相
奸者並依此例從之

十二年二月嚴侵盜倉糧之罪

巡撫彭禮言各府州縣預備倉糧凡遇查盤每石準
開耗一升三年準三升三年之外不準開耗若虧折
不及百石者從帝論罪責償其侵盜等項虧折百石
之上者從重論罪帝從之

十三年二月定問刑條例

刑部奏洪武末定大明律後又申明大誥諸有罪減等累朝遵用其法外遺奸列聖因時損益而有例例以輔律非以破律也乃中外巧法吏多引例以便己私而律寔格不用于是命尚書白昂等會九卿議增歷年問刑條例經久可行者二百九十七條以聞帝從之

嚴私通朝貢人之禁

法司議禁約事宜有違例將軍器貨與夷人者問擬

斬罪內外軍民人等私通往來投托買賣及撥置害
人透漏事情者俱發邊衛充軍帝命通行禁約

十六年十月嚴威逼父母致死之律

撫州人江緣一擊殺其弟緣四遺一女其母吳氏以
許嫁李氏緣一又欲取所受聘財母不從緣一怒罵
劫奪之母忿之而自縊有司擬罵母律絞巡按王哲
以律毆父母者斬緣一手殺親弟逼死親母使得全
首領情重律輕具獄以聞法司覆議毆母律斬決不

待時仍請後有威逼祖父母父母死者悉依此斷從之

十七年二月嚴妖書惑衆之禁

吏部尚書馬文升言會審重囚坐妖書惑衆者甚多與其誅於已犯不若禁於未然乞勅榜諭有收藏者許半月內首告官司有私錄者厥罪惟均從之

五月制行革弊弭災事宜

從法司之請也刑部條上事宜畧曰一京城勢家或

攬納逼債或侵奪強買或殺人焚燬或窩盜分贓事
發則抗拒官司今後令錦衣衛執送職司重治一舊
例在京問囚三審不服及在外問結赴京奏訴者俱
改調別問近歲多拘成案有明訴枉屈而置之不問
者請令果有冤枉即與辨理一定例巡按會審由都
布二司并府州縣衛送者申刑部由巡按及按察司
送者申都察院各轉詳大理寺審擬今重囚止申巡
按更不會審轉詳以致輕重任情淹禁無度請令照

例申詳一奸民包攬錢糧勒取財貨各倉內外管事并勢要之人交通受納事發止坐攬頭請令緝事衙門并窮究得財之人明正其罪又大理寺條上事宜畧曰一矜擬重囚從原問衙門錄奏情或有偏請令刑部都察院會本寺公同具奏一外官有用刑因而致死者請依酷刑例為民一外官因公挾私濫禁平人致死者請亦照酷刑問斷一充軍賄脫止坐本犯請查解批追究賣放之人從重參問一奏訴詞訟每

事具題近于煩瑣請照軍職徒杖罪先行發落半月
類奏一誣告平人其致死被誣之人律所未載近日
俱問絞罪殊非適中請令誣告因考禁而死者依本
律餘照常例一舊例王府文職希圖改調故意犯賊
者發邊遠叙用蓋指令人誣告或科歛不入己者近
來凡受賊者皆擬調似非律意請依律罷職一婦人
再嫁以前夫之女與後夫之子成婚有關風化請依
娶同母異父姊妹律斷一搥備人等犯笞杖罪令贖

鈔有無力者監繫不得歸結請依在逃律許的決帝
皆從之

申嚴勦戚家人依勢擾民之禁

給事中楊褫言方今弊政莫如貴戚家人之害人請
重為禁約凡皇親所招無籍之人依詐冒投充例論
罪法司議請今後生事害人者除真犯死罪外徒以
上於所犯地方枷一月發邊衛充軍情重并逃回再
犯者枷三月發遣家長故縱及官司畏避者通行叅

奏仍榜示通街從之

六月定許告原問官罪例

先是成化間定議凡許告原問官司者覈究得實然後逮問至是南京御史王良臣按指揮周愷等怙勢贖賄愷等遂許良臣詔下南京法司逮繫會鞫侍郎楊守隨言此與舊章不合請今後官吏軍民奏訴牽緣別事撫拾原問官者立案不行所奏事仍令問結虛詐者擬罪原問官枉斷亦罪乃下其議於三法司

法司覆奏如所請從之

七月嚴藏匿盜賊之罪

巡撫張本奏江西諸盜皆由巨室藏匿分贓遂至倡
獗今獲匿主五人亦問擬斬罪比例梟首示衆法司
會議以為宜從之

十月申明殺人不同謀及臨時拒捕之律

御史魏紳奏在外有司問故殺鬪殺其助殺之人俱
擬為從坐以流罪又竊盜臨時拒捕不得財者止作

犯罪拒捕科斷其拒捕不係臨時者或反坐斬罪俱不合律意於是法司覆議令今後凡故殺鬪殺正犯坐擬斬絞其有同行之人本非同謀而但不勸阻者止問不應杖罪竊盜若臨時拒捕雖不得財亦坐以斬庶律意不違帝從之

十八年二月定南京決囚之例

南京刑部奏決不待時者三人大理寺已審允下法司議謂在京重囚間有決不待時者審允奏請至刑

科三覆奏或蒙恩仍監候會審南京無覆奏例乞俟
秋後審竟類奏定奪如有巨憝難依常例者更具奏
處決請著為令從之

武宗正德五年三月閣臣奏請改定近例

時寃獄衆多大學士李東陽等因風霾上言請王府
逃校窩主隣佑連累者乞釋放傾使假銀偽造印信
舉放私債乞照本律問罪餘皆放免充軍正犯已故
無子婦人一應家屬乞免遣死罪重訖三次者乞免

加罪婦人無夫者乞免配邊軍凡犯罪家產除重罪
外乞免沒官兩京見監罪囚乞照熟審事例奏奪文
武官罰米家貧者乞展限仍免倍納各處獲盜數多
不無寬抑乞令研審毋得妄希升職免罪從之

十年六月詔凡侵盜部解官物照侵盜倉庫科斷

十三年九月定子弟劫父兄罪例

時有子糾他人劫其父及兄者刑部循例以同居卑
幼引他人為盜及私擅用財擬罪止徒杖大理卿劉

王奏律以弼教此人倫之變如前擬是置倫理於不
論盜賊益肆而莫禁矣於是改擬重罪著為令

十六年十二月禁武臣濫刑

御史姚謨奏言各將領于所轄官軍除臨陣退縮許
用軍法外其餘有犯止用常刑如酷用非刑致損人
命聽撫按糾舉論罪

世宗嘉靖二年十月令決囚務於未刻前畢事

先是弘治十六年法司言近時重囚臨決復請展轉

稽候常至夜分或有他虞請令決囚有抱訴鼓狀者
俱於午前封進午後不許重訴從之至是御史陳迥
復言慎刑之道在審初不在臨刑正統年間有批予
留人事例以致富囚多圖僥倖夤緣請託萬一奸黨
乘藉昏黑意外求生雖罪監臨亦損國威今後決囚
前期一日該科覆奏畢即給駕帖取囚赴市行刑限
未刻前畢事如有鳴鼓訴冤許三覆奏前封進奏後
無得輒受違者坐罪從之

臣等謹按刑法志時奸黨廖鵬父子及王欽陶杰等頗有內援給事中劉濟等懼帝意不決亦為申奏言往歲三覆奏畢待駕帖則已日午鼓下受訴得報且及未申時再請行刑時已過酉大非刑人於市與衆棄之之意故有是命云

五年九月申明訴寃之例

先時帝諭法司刑官任意偏聽或徇私受囑致令負寃輒入禁中申愬至有自縊死者良可憐憫宜即申

明律例戒諭所屬如各犯申懇得實原問官從重究治容情不叅奏者一體治罪於是都察院如諭申飭但民人冤抑止許赴通政司或登聞鼓下投遞有擅入禁門叫訴及撫拾辱罵原問官及挾制官吏者并主使之人俱重治帝是之命榜示遵守

七年正月罷官校提人之例

給事中蔡經言國家內設法司外設撫按按察等官皆為陛下奉三尺法者故內外有犯責之推鞠在諸

臣亦足辨之矣今陛下時差官校逮繫此屬假勢作威淫刑黷貨譬則虎狼蛇虺咸被毒噬願自今罷勿遣刑部尚書胡世寧請從其議帝納之

霍韜疏曰天下軍衛一體也錦衣等衛獨稱親軍備禁近也錦衣復兼刑獄不亦甚乎天下刑獄付三法司足矣錦衣衛復橫撓之越介冑之職侵刀筆之權不亦甚乎

四月嚴安殺報功罪例

尚書桂萼言捕盜之官有司多羅織平民軍職多妄報首級並宜究治自後凡以妄殺報功者依故殺抵罪下所司議行

八年三月申官吏貪酷及故禁故勘諸律

刑部覆詹事霍韜疏言官以贓敗及故禁故勘平人致死者律當絞斬後人惡其厲已於贓罪得贖刑而致人死者置之不問以致贓暴之吏得肆帝是其言詔今後官吏犯枉法贓者追贓入官仍問軍發遣酷

刑致死人命雖因公亦照例為民其故禁故勘者論如律至萬歷三年九月吏部侍郎何維栢言凡守令贓私顯著者將所犯贓私追還并押發各邊自行輸納完日回籍為民官吏因受人財及法外用刑增減人重罪致死者坐以死罪從之

二十二年四月定偽造文書事例

時有偽造察院文書畫押者刑部擬以盜用印信律大理寺駁之詔法司會議尚書聞淵等議文書以印

信為重押字次之今後盜用印信即無押字俱坐杖
流若止犯押字不必槩用前律又如詐為衙門關
防俱比各衙門印信擬罪凡盜用棄毀偽造悉與同
科詔從之著為令

二十八年詔增定問刑條例

刑部尚書喻茂堅言自弘治間定例垂五十年乞敕
臣等會同三法司申明問刑條例及嘉靖元年後欽
定事例永為遵守弘治十三年以後嘉靖元年以前

事例雖奉詔革除顧有因事條陳擬議精當可採者亦宜詳檢會茂堅去官詔尚書顧應祥等定議明年十二月進呈刊布增至二百四十九條詔有任情妄引者重治至三十四年二月刑部尚書何鰲奏上九事一凡犯姦總麻以上親之妻及妻前夫之女同母異父姊妹者姦夫近衛充軍婦女離異歸宗聽夫嫁賣一凡用財冒襲軍職者俱依成祖欽定妄告冒籍不實之官并保勘官俱罷職揭黃永不得襲若有贓

以枉法論一凡宗室悖逆祖訓出城越關赴京者即奏請先降為庶人送回一宗室互相訐奏行勘未結而輒誣奏勘官及以不干己事捏奏者不論事情輕重俱寢不行一軍職犯死罪及充軍者子孫俱不許襲一沿邊總兵以下官員但有科歛入己贓至二百兩以上戍邊四百兩以上梟示一沿邊沿海寇至不能固守致賊陷入衛所掌印官與捕盜官俱比守邊將帥失陷城塞律斬府州縣降級別用其府州縣原

無衛所專城之責者如有前項失事不分邊腹掌印
捕盜官俱比牧民官激變良民因而失陷律斬一凡
搶奪至三次犯罪者俱比竊盜三犯絞罪奏請定奪
一凡軍職有犯依勢役占并受財賣放餘丁至三十
名以上致廢防守俱比賣放正軍包納月錢至二十
名以上事例罷職戍邊議入皆允行

三十九年八月詔允條陳問刑三事

給事中侯廷柱言一南京刑部各司官有擅受民詞

不由通政使及各衙門參送者有獄成徑自發遣不
關白本堂者又有已經大理寺評允而改變情節者
夫兩京一體三尺法當與共之請嚴禁一斷獄慎於
初情屍傷憑之檢驗近者專委之各城兵馬司以致
吏書忤作相比為奸宜令覆覈一聽斷宜速今一人
繫獄動至破家在歇家有保頭之例在守門有門禁
之擾在皂卒有杖頭之錢在庫役有掌櫃之號此其
弊端皆由於聽斷不速宜懲一戒百詔先行

穆宗隆慶三年正月更定買休賣休律

大理寺少卿王諱言問刑官多違背律例獨任意見如律文犯奸條下所謂買休賣休和娶人妻者本指用財買求其妻又使之休賣其妻而因以娶之者言也故律應離異歸宗財禮入官至若夫婦不合者律應離異婦人犯奸者律從嫁賣則後夫憑媒用財娶以為妻原非奸情律所不禁今則槩引買休賣休和娶之律臣不知其所謂時刑部尚書毛愷力爭之廷

臣皆是諍議得旨買休賣休本屬奸條今後有犯非
係奸情者不得引用

五年四月刊布律例諸書

刑科給事中王之垣等言律解不一理官所執互殊
請以大明律諸家注解折衷定論纂輯成書叅以續
定事例列附條例之後刊布中外以明法守仍乞申
飭中外有司及今科進士各熟讀律例從之後萬厯
二年五月給事中鄔昇等又請將大明律注參酌考

訂并續增條例詳議上請共成一書頒行中外部覆律經聖祖神謀參酌原無微文隱義諸家各執已見聚訟紛如竊恐巧文之吏任注釋而背律文猶經生棄經任傳弊不可言矣至於問刑條例乃採之累朝詔令及廷臣建白可補律文之所未悉自嘉靖三十二年後未經補輯合將嘉靖三十四年後與刑名相關事體參定附續刊布中外報可

神宗萬曆三年七月令巡城御史不得擅問官軍

時號頭指揮李清以私債事與人詰告巡城御史拘
清刑責事聞帝命今後三營官軍有犯非命盜事情
須關白總協大臣不許徑自勾攝

五年八月詔治隱匿盜情者罪

時南直隸上海縣有盜三十餘人進劫場官殺死家
屬事聞得旨撫按官嚴督兵備等官整飭武備有司
有隱匿盜情反累失主者叅奏重治後六年七月刑
部覆議御史崔廷試疏捕盜官平時不能謹嚴以消

未形之患及至失事多方躡訪刻意追求止圖免罪
邀功但有捉獲即嚴刑拷訊飾假為真自後令所獲
人贓呈送正官研審倘係捕役冒功仇家攀陷辨釋
治罪帝允行之

六年十二月嚴私鑄律

詔以京城內外錢法壅滯重困小民今後再行申飭
各地方有犯私鑄及倡言阻撓者除為首依律論死
餘各問罪不貸

七年三月改侵盜錢糧加侵盜邊海錢糧一倍者罪照邊海事例著為令

舊例盜銀二百兩糧四百石者罪論斬此在邊海行之
之以比腹裡較重也御史胡執禮見腹裡侵盜者多
欲以比例行之部覆以為大嚴議盜銀四百兩糧八百
石者罪如之仍責限一年完贓者準改戍過限不完
者處斬餘拘親屬追賠後十一年六月科臣有言律
文侵盜錢糧皆準徒五年後因輕易犯復設條例永

遠充軍近御史胡執禮請將侵至四百兩以上者照邊海事例處斬竊謂充軍下死罪一等而永遠世世勾補與死埒矣宜仍照原定條例新例停止從之

五月定廣東盜珠罪例

刑部奏廣東珠池之盜因無律例槩以強盜坐之似屬過重今議比常人盜官物併贓論罪免刺仍分為三等其拒捕者為一等首從俱遠戍若殺傷人為首者斬不曾拒捕聚眾至二十人以上珠值銀二十兩

以上者為二等為首者戍為從者枷號三月照罪發
落人與珠俱不及數者為三等為首者初犯枷三月
若假以盜珠為名劫客商船隻及人財物者俱依強
盜論

十月申明武職犯贓罪例

總督劉堯誨上言查問刑條例凡衛所職官賣放正
軍包攬月糧至二十石以上者罷職發邊衛守禦凡
沿邊地方副總等官但有科歛及扣減入己贓私至

二百兩以上者發邊衛永遠充軍四百兩以上者斬
首示衆請通行沿海地方犯者照例究處從之

十一年五月禁革訪察科罰等弊

兵科給事中孫瑋奏一廠衛受詞當禁言廠衛當遵
照勅書察訪不軌妖言人命強盜重事其軍民詞訟
不宜干預一訪察當慎言訪察法行株連人衆往往
無辜入羅而吞舟者竊笑乞勅撫按不必槩行訪拏
一濫罰當懲言民窮財盡依律科罪猶懼不支乞嚴

禁罪外濫罰一立枷當革言立枷三百餘斤用木柱
之其人晝夜跣立無不立死乞勅法司毀不復用帝
命枷號重懲克惡宜照舊廠衛著照勅旨行事在外
訪察科罰等弊依議禁革

十二年十二月嚴私行披剃之禁

戶部尚書王遴言洪武二十七年禁僧道募化私創
菴堂者成永樂元年禁軍民私自披剃者成今邪教
盛行私會香錢者借貸典賣以應民俗柰何不窮且

盜也今後凡披剃年四十以下并無度牒者放歸農
或遞還本籍或收入里戶私會者坐以左道惑衆之
律帝命議行

十三年四月問刑條例書成

刑部尚書舒化等輯嘉靖三十四年以後詔令及宗
藩條例軍政條例捕盜條格漕運議單與刑名相關
者律為正文例為附主凡三百八十二條刊布中外
問刑衙門奉書從事

九月申明刺字事例

刑部尚書舒化奏刺字之法所以懲盜凡盜賊犯徒罪以下者不問贓數多寡並從刺字監守常人盜二條據律各載刺字之文而滿貫罪至斬絞者從無刺字之例今後除各盜犯該徒罪以下刺字外其雜犯斬絞準徒者俱照舊免刺得旨軍官軍人犯該徒流律並免刺以後文職照軍官一體行其餘俱以盜論及雜犯斬絞準徒者俱盡本法刺字著為令後十二

月刑部以律文內監守常人盜俱於右臂刺盜官物三字又有以盜論者刺字準盜者免刺載諸名例甚明然二百年來以盜論者亦未以刺字之法繩之蓋盜賊與侵欺犯自不同故與真盜之罪終屬稍間且今犯法者有議贖之條竊盜不準贖刺配亦所甘心若糧里庫役有力者準贖矣又從而刺之不亦甚乎得旨盜犯贓貫原有正律以從真盜實贓不論犯徒減徒務遵前旨具查盤坐侵等項準照舊免刺

十五年十月定在外法司單奏例

左都御史吳時來言在京惡逆與強盜真犯雖停刑之年亦不時處決迺凶惡至於殺父即時凌遲猶有餘憾而在此類反得遷延歲月以故事當類奏無單奏例耳夫單奏急詞也類奏緩詞也如此獄在外數年使其瘐死何以快神人之憤哉今後在外凡有此者御史單詳到院院寺單奏決單一到即時處決其死者下府州縣戮其屍庶典刑得正旨下部寺酌

議從之

二十一年九月命榜示省刑條例

刑部尚書孫丕揚言一律例原無宜省刑四條勿用磨骨釘寸寸緊夾棍勿用數百斤三四人立枷勿用帶根板水缸杖生樹棍勿用腦箍竹簽嘴掌背花二倫理當重宜省刑四條父子兄弟告者恕父兄刑夫妻尊長告者恕夫與尊長刑子弟替父兄誣告者省子弟刑妻妾替夫誣告者省妻妾刑三刑流防過宜省

刑四條先枷撻者後莫枷撻人枷撻者我莫枷撻已
刑下體莫刑上體已撻輸家莫撻贏家四情偏防過
宜省刑四條勿偏聽原被告加刑勿過疑證佐加刑
勿出我聰明加刑勿怒人強項加刑五避天時宜省
刑四條早辰宜省刑寒暑宜省刑霜雪宜省刑節令
宜省刑六體人情宜省刑四條屍親宜省刑口訥宜
省刑救尊長者宜省刑訴冤枉者宜省刑七人可矜
者宜省刑四條老少者宜省刑饑寒者宜省刑病初

愈者宜省刑殘廢篤疾者宜省刑八人可疑者宜省刑四條官員宜省刑生儒宜省刑婦女宜省刑賊情曖昧者宜省刑帝命通行榜禁

熹宗天啟七年十二月

時莊烈帝已即位

詔草大枷

先是劉瑾創為立枷至忠賢益為大枷又設斷脊墮指刺心之刑中外側足都人至不敢偶語莊烈帝在藩邸稔知其惡至是詔法司革之

臣等謹按刑法志載帝承神宗廢弛熹宗昏亂之

後銳意總理用刑頗急大臣多下獄者其諸臣訟理申救之疏春明夢餘錄所載者如中允黃道周之救閣臣錢龍錫閣臣成基命之救立決科道杜齊芳李長春御史易應昌之議喬允升等罪御史李右謙之救戶部尚書畢自嚴通政徐石麟之救刑部尚書鄭三俊監生涂仲吉之救黃道周是也至十四年大學士范復粹疏請清獄言獄中文武累臣至百四十有奇甚可痛十六年給事中龔鼎

孽請罷詔獄廷杖言祖法相沿要以待大奸巨慝
謀逆僭亂之徒非為臣子語言狂戇設也俱不報
所謂國事日棘惟用重法以繩羣臣救過不暇而
卒無補於亂亡者也

欽定續文獻通考卷一百三十六

欽定四庫全書

史部

欽定續文獻通考卷一百三十八

給事中^臣陳化龍覆勘

總校官內閣中書^臣孫溶

欽定四庫全書

欽定續文獻通考卷一百三十七

刑考

徒流

配沒

宋寧宗嘉定六年時鈔法楮令行告訐繁興抵罪籍沒者衆莫敢上聞起居舍人真德秀奏言自此籍沒之產以漸給還

奏畧曰頃者朝廷以楮幣日輕行新令慮民之虧減

牟利倣之以沒入家貲之法中外有司苟能體朝廷之意擇其甚者而加懲則人孰不畏乃有胥吏利其多貲而因以傾奪者有閭巷平時睚眦而因以中傷者夫估籍之禍甚於刑誅刑誅雖酷痛止其身貲財一空盡室溝壑今乃不量其輕重而輒施之是豈朝廷立法之本意耶當此郊需之餘伏望明敕監司守令自今民間有違犯約束諭告勿悛者止當嚴置憲典不許更籍其家亦足以廣聖朝維新之澤

理宗紹定五年五月詔自今齊民有罪監司守臣毋輒籍沒其家必具聞俟命

淳祐六年五月命自今官吏贓狀敗露經臺諫監司奏劾分明者即下所屬州郡拘贓聽朝廷議罰或移為他用併籍其家

從右正言何琮奏請也

大學衍義補曰宋人承五代為刺配之法既杖其脊又配其人而且刺其面是一人之身一事之犯

而兼受三刑也且聚罪廢無聊之人於牢城之中使之合羣以構怨其憤憤不平之心無所於洩心中雖欲自新而面上之文已不可去其亡去為盜挺起為亂又何怪哉宋江以三十六人橫行河朔迄不能制是皆刺配之徒在在有為之耳目也

遼制死刑之外有籍沒之法流徒刑有點刺之法籍沒之法始於太祖案裕悅舒魯遇害事以其首惡

家屬沒入幹里及淳欽皇后時析出以為著帳郎君
至世宗詔免之其後內外戚屬及世官之家犯叛逆
等罪復沒入焉餘人則沒為著帳戶其沒入宮分賜
臣下者亦有之

流刑始太宗會同時皇族錫里郎君謀毒通事嘉哩
等命重杖之及其妻流於矩巴哩密河其後世宗天祿
二年天德蕭翰榴格及其弟璵都等謀反天德伏誅
杖翰流榴格遣璵都使哈噶斯國景宗保寧二年國

舅蕭海只等盜殺樞密使蕭思溫誅之流其弟紳圖
於黃龍府興宗重熙七年南面侍御準格爾詐取女
直貨物罪死上以有吏能黥而流之道宗太康二年
上欲觀起居注修注郎布當及等不進各杖而罷之
流林牙蕭岩壽於威部大安三年燕國夫人錫庫厭
魅梁王伏誅子蘭陵郡王蕭綽哈除名置邊郡徒刑
國家舊使遠國多用犯徒罪而有才畧者使還即除
其罪如聖宗開泰九年郎君老使沙州還詔釋宿累

是也餘如開泰元年進士康文昭等坐論知貢舉裴元感邢祥私曲秘書省李萬上書辭涉怨訕皆杖而徒之

配法如聖宗統和四年第山西諸將功罪特哩袞瑤昇等九人皆以聞敵逃遁奪官配伊喇徹爾仍配隸本貫又興宗重熙二十一年近侍實達爾盧寶偽學御畫免死配役終身

聖宗統和二十九年詔自今世家子孫犯死當照與齊

民同科

舊法宰相節度使世選之家子孫犯罪徒杖如齊民
惟免黥面至是詔但犯罪當黥即準法同科

開泰八年詔竊盜贓滿二十五貫其首處死從者決流
先是竊盜贓滿十貫為首者處死其法太重故有此
令時那母古犯竊盜者十有三次皆以情不可恕論
棄市因詔自今三犯竊盜者黥額四則黥面徒五年
至於五則處死

興宗重熙二年定黥面之罪

時有司奏元年詔曰犯重罪徒終身者加以捶楚而
又黥面是犯一罪而具三刑宜免黥其職事官及宰
相節度使世選之家子孫犯奸罪至徒者未審黥否
上諭曰犯罪而改過自新者亦有可用之人一黥其
面終身為辱朕甚憫焉今後犯終身徒者止刺頸奴
婢犯逃若盜其主物主無得擅黥其面刺臂及頸者
聽犯竊盜者初刺右臂再刺左三刺頸之右四刺左

至於五則處死

道宗大安四年五月詔後徒終身者五歲免之

金太祖天輔三年正月東京人為質者永吉等五人結衆謀叛事覺誅其首惡餘皆杖百沒入家屬資產之半詔知東京事鄂囉繼有犯者並如之

太宗天會七年定竊盜得物者罪例

凡竊盜但得物徒三年十貫以上徒五年刺字充下軍三十貫以上徒終身仍以賊滿盡刺字於面五十

貫以上死徵償如舊制

世宗大定九年二月制妄言邊關兵馬者徒二年

章宗明昌二年十一月制投匿名書徒四年

五年定徒二年以下者杖六十二年以上杖七十婦人犯者並決五十著於敕條

時尚書省奏在制名例內徒年之律無決杖之文便不用杖緣先為流刑非今所宜且代流役四年以上俱決杖而徒三年以下難復不用婦人比之男子雖

差輕亦當例減遂有此令

臣等謹按大定間濟南尹梁肅上疏曰刑罰世輕世重自漢文除肉刑罪至徒者帶鐐居役歲滿釋之家無魚丁者加杖準徒今取遼季之法徒一年者杖一百是一罪二刑也刑罰之重於斯為甚今太平日久當用中典有司猶用重法臣實痛之自今徒罪之人止宜居作更不決杖朝廷以為今法已輕於古恐滋奸惡不從是金制徒刑決杖其來

已久何待明昌五年始議定制意大定後中間別有變更至是復之稍從輕減特史文未詳耳

承安三年四月定明安穆昆身犯私鹽私酒麴殺牛者徒一年杖數不以贖論不及徒者杖五十

五年八月更定鎮防軍犯徒配役法

九月定皇族收養異姓為子者徒三年姓同者減二等立嫡違法者徒一年

泰和元年十二月新律成增徒至四年五月為七

六年三月敕尚書省祖父母父母無人侍養而子孫遠遊至經歲者甚傷風化雖舊有徒二年之罪似涉太輕其攷前律再議以聞

元徒法五年數杖數相附麗為加減鹽徒盜賊既決而又鐐之流則南人遷於迤北之地北人遷於湖廣之鄉

詳刑

制篇

諸徒囚晝則帶鐐居役夜則入囚牢房其流罪發各處屯種者止令監臨關防屯種諸流遠囚徒惟女直

高麗二族流湖廣餘並流尼嚕罕及取海青之地泰定間又從御史言以職官贓污者流放廣南

臣等謹按元制流罪北人徙南南人徙北去家萬里往往道死文宗天歷二年始更遷徙法凡應徙者驗所居遠近移之千里在道遇赦者皆得放還如不悛再犯徙之本省不毛之地十年無過則量移之所遷人死妻子聽歸土著順帝元統初徙翰林學士王結言移鄉者改過聽還其鄉著為令

世祖至元十二年二月禁民間賭博犯者流之

十五年正月敕官吏隱匿及擅易馬匹私配婦人者沒其家軍官不能撫治軍士及兵擾至逃亡者沒其家貲之半

趙天麟上策曰竊見方今或因賦濫或陷逆流例皆籍沒其財歸諸內府散於宗室班於外家彼犯罪之家非刻剝下民則兼并於貧人以得之今而黷彰孽露干我常刑是因利以賈害也但國家不

患無財貨之用右族不患有饑寒之窘豈賴夫籍沒貪污之財以周所用乎今未免此事者亦因循而不以為意故也伏望陛下留心細慮當籍沒之財則於一所明立簿記待諸積之多散於無告之人可也

十七年十一月詔有罪配役者量其程遠近

配役之法不一有配隸淘金者至元二十四年扎爾古齊奏去歲審囚官所錄囚數南京濟南兩路應死

罪已一百九十人若總校諸路為數必多宜留扎魯
忽赤數人分道行刑帝曰囚非羣羊豈可遽殺耶宜
悉配隸淘金

十九年十一月中書省臣言天下重囚除謀反大逆殺
祖父母父母妻殺夫奴殺主並正典刑外餘犯死罪者
令充日本占城緬國軍從之

是月定勢家為商賈阻遏官民船者沒其家

三十年四月申嚴酒禁有私造者財產女子入官犯人配役

先是十四年五月申嚴大都酒禁犯者籍其家貲散之貧民至是又有是令後二十六年十月禁内外百官受人饋酒食者沒其家貲之半

二十三年四月定竊物者配役之例

中書省臣言比奉旨凡為盜者毋釋今竊鈔數貫及佩刀微物與童幼竊物者悉令配役臣竊議一犯者杖釋再犯者依法配役為宜帝曰朕以漢人徇私用金泰和律處事致盜賊滋衆故有是言人命至重今

後非詳讞者勿輒殺人

二十八年十月詔嚴益部殷陽泰安寧海東平濟寧畋獵之禁犯者沒家貲之半

成宗元貞二年五月詔諸徒者限一年釋之毋杖

大德四年正月申嚴惡少不法之禁犯者黥刺杖七十拘後

八年正月以災異詔雜犯之罪當杖者減輕當笞者並免私鹽者徒役者減一年

十一月詔內郡江南人凡為盜黥三次者謫戍遼陽諸色人及高麗人三次免黥謫戍湖廣盜禁藥馬者初犯謫戍再犯者死

仁宗延祐七年六月定邊地盜葶畜罪犯者給各部力後如不悛斷罪如內地法

英宗至治二年三月禁捕天鵞犯者籍其家

臣等謹按大德十年四月詔凡匿鷹犬者沒家貲之半笞三十今復有此令夫以禽獸細微而至籍

沒貲產不太甚乎元政之衰於此可見

定徒者減杖之例

時漳州路推官上言律徒者不杖今杖而又徒非恤刑之意宜加徒減杖遂定為令

元史曹伯啓傳曰五刑者刑異五等今黥杖徒役於千里之外百無一生還者是一人身被五刑非五刑各底於一人也法當改丞相雖是之卒不果行

文宗天曆元年十月中書省臣言凡有罪者既籍其家
請勿沒其人妻子制可

二年正月省臣又言近籍沒奇徹家其子年十六請
令與其母同居仍請繼今臣僚有罪致籍沒者其妻
其子他人不得陳乞亦不得沒為官口從之六月陝
西行臺御史孔思迪言人倫之中夫婦為重比見內
外大臣得罪就刑者其妻妾即斷付他人似與朝廷
旌表貞節之旨不侔夫亡終制之令相反況以失節

之婦配有功之人又與前賢所謂取失節者以配身是已失節之意不同今後凡負國之人籍沒奴婢財產不必罪其妻子當典刑者則孥戮之不必斷付他人庶使婦人均得守節請著為令從之至順帝至元六年九月又詔今後有罪者毋籍其妻女以配人

趙天麟策曰周有八議議賢議能故賢能雖父祖子弟陷罪國家亦不連坐禁錮而棄之也竊見方今陷大罪者除本人已就極刑外其妻孥親屬有

投諸遠方而不齒者有繫於場治而應役者有役
於右姓而為臧獲者有配於士伍而就苦地者斯
皆除惡務盡之當然竊恐有委沙遺金之恨也古
者父子兄弟罪不相及伏望陛下下令凡籍沒之
家子孫弟姪若有超然特異足學知政之人聽有
司公舉錄德量能而用之不在禁錮之限

明制徒刑五

王圻曰徒者奴也蓋奴辱之謂男子入於
罪戾法當任以工役即漢之城旦舂是也

唐因隋文帝制三等
加為五等明仍之

徒一年杖六十年半杖七十二年

杖八十二年半杖九十三年杖一百每杖十及徒半年

為一等加減流刑三

王圻曰流宥五刑謂不忍刑殺宥之於遠使其離鄉土終身不返殆

猶水流一去不復返也蓋古者大罪投之四裔或海外及九州外中國外始於唐虞明從之

二千里

二千五百里三千里皆杖一百每五百里為一等加減

徒有總徒四年

遇例減一年者

有準徒五年

斬絞雜犯減等者

流有安

置有遷徒

去鄉一千里杖一百準徒二年

有口外為民其重者曰充軍

充軍者明初惟邊方屯種後定制分極邊烟瘴邊遠邊

衛沿海附近軍有終身有永遠

凡徒流再犯者流者於原配處所依工樂戶留住法三
流並決杖一百拘役三年拘役者流人初止安置今加
以居作即唐宋所謂加役流也徒者於原役之所依所
紀杖數年限決訖應役毋得過四年

初制流罪三等視地遠近邊衛充軍有定所蓋降死一
等惟流與充軍為重然名例律稱二死三流各同為一
減如二死遇恩赦減一等即流三千里流三等以大誥
減一等皆徒五年犯流罪者無不減至徒罪矣故三流

常設而不用而充軍之例為獨重律充軍凡四十六條
諸司職掌內二十二條則洪武間例皆律所不載者其
嘉靖二十九年條例充軍凡二百一十三例與萬厯十
三年所定大畧相同

凡應合抄劄者曰姦黨曰謀反大逆曰姦黨惡曰造偽
鈔曰殺一家三人曰採生折割人為首

徒役各照所徒年限並以到配所之日為始發鹽場者
每日煎鹽三觔鐵冶者每日炒鐵三觔另項結課

太祖洪武八年二月敕刑官自今凡雜犯死罪者免死
輸作終身徒流罪限年輸作官吏受贓及雜犯私罪當
罷職役者發鳳陽屯種民犯流罪者鳳陽輸作一年然
後屯種

十五年正月命將校士卒雜犯死罪者免死杖發戍邊
後十六年正月令徒流笞杖罪囚代農民力役贖罪
後十日準笞二十杖一十徒流各計年準之雜犯死
罪者罰戍邊

二十一年令謀逆姦黨造偽鈔等罪沒其貲產丁口其餘止收貲產仍以農器耕牛還之

凡犯籍沒者除反叛外其餘止沒田產孳畜田產內有墳塋者不在籍沒之限

二十四年六月命死罪囚輸役造金吾衛舍

二十六年定充軍之制

凡應充軍者大理寺審訖開付陝西司本部置立文簿注姓名年籍鄉貫依南北籍編排為二冊一進內

府一付該管百戶領去有逃故按籍勾補

惠帝建文四年

時成祖已即位

令徒罪囚人撥充國子監膳夫

照年限拘役

八月定罪人輸作之例

笞罪五等每等五日杖罪五等每等十日徒罪準所
徒年月加以應杖之數輸役流罪三等俱役四年一
百日雜犯死罪工役終身

九月令雜犯死罪及流罪赴北平種田

帝諭法司曰前令罪人入米贖罪以省轉輸之勞近聞有貧不能致米者往往憂感以死非朕本意自今除十惡死罪外其餘死罪及流罪令挈家赴北平種田流罪三年死罪五年後錄為良民其徒罪令煎鹽杖罪輸役如故仍選徒罪以下罷職官假以職名俾督民耕種三年有成績實授無成仍坐原罪

成祖永樂二年正月詔自今有犯交易金銀之禁者免

死

大政紀載永樂元年下令禁金銀交易欲行鈔法也

徙家於興州屯戍

十二月御史張翥言山西行都司所屬地方切近沙漠軍衛充實則虜不敢為患比軍人犯徒流罪者悉徙興州屯戍恐邊衛軍士圖易避難必多故犯以求遷徙則隊伍日減邊備不足乞令臨邊衛所軍人犯徒流罪者止從科斷仍留原衛戍守從之

三年十二月定徒流罪條例

徒流發充軍者於長安左右門造守衛官軍飯食於漢趙二府牧馬不充軍者充國子監膳夫將軍軍伴

土工或於北京為民種田遵化炒鐵或自買船遞運
或擺站運鹽笞杖罪止鑄錢準工

十年正月令誣告犯徒流等罪者免罪挈妻子徙盧龍
山海永平小興州為民種田

十一年五月令囚徒運糧無力者發天壽山種樹死罪
終身徒流各照年限杖罪每等五百株笞罪每等一百
株

宣宗宣德二年令匠役雜犯死罪鎖鑊終身工役徒流

笞杖罪論年限工役

英宗正統五年二月定罪囚無力輸贖充軍擺站事例
刑部議定凡罪囚無力贖罪者沿海邊衛旗軍舍餘
照舊例的決還役隨住陝西民雜犯死罪文職官吏
知印承差職罪滿貫照例發莊浪等衛安遠等遞運
所充軍擺站其餘各處軍職旗軍舍餘笞杖的決雜
犯死罪五年流罪四年徒罪照徒年限福建浙江山
東發本處沿海貴州四川廣西雲南陝西湖廣發本

處沿邊廣東發廣西沿邊江西南直隸發浙江金山
衛沿海北直隸河南發宣府俱送總兵官處定撥衛
所立功備御哨瞭滿日發回衛所還職着役民人陰
湯人等俱發附近衝要處擺站

十月復軍丁力士犯盜戍邊例

刑部言舊例軍丁力士犯盜者皆戍邊比者詔從律
斷但令輸作復役以是人輕於犯盜請復舊例庶使
知懼從之

十一月更定受枉法贓充軍之例

初制凡官吏人等犯枉法贓者不分南北俱發北方
邊衛充軍至是三法司言洪武定律時鈔貴物賤所
以枉法贓至百二十貫免絞充軍今鈔賤物貴若以
物估鈔至百二十貫枉法贓俱發充軍輕重失倫矣
今後文職官吏人等受枉法贓比律該絞者估鈔八
百貫之上俱發北方邊衛充軍其受贓不及前數者
視見行例發落從之

九年六月命受財教唆誣告平人者充軍著為令

十年二月申嚴薦越誣告遷戍之例

誣十人以上者軍發邊衛民遷口外從刑部請也

景帝景泰元年八月詔官吏人等為事充軍者止終本
身

初宣德十年詔凡犯罪充軍者止終本身至是命照
此例行憲宗成化十六年九月戶部會議犯罪充軍
病故者例終本身其各衛因原問官司移文故軍雖

沒一概按名清勾有司亦不查理率以戶丁抵補實為無辜宜令分豁奏入如議

刑法志曰明初法嚴充軍者縣以千數數傳而後以萬計矣有丁盡戶絕止存軍產者或并無軍屋戶名未除者朝廷歲遣御史清軍有缺必補每當勾丁逮捕族屬里長延及他甲雞犬為之不寧論者謂既減死罪一等而法反加於刀鋸之上如草除所遣謫至國亡戌籍猶有存者刑莫慘於此矣

憲宗成化六年三月申誑騙財物遣戍例

吏部尚書姚夔等奏京城小人多放官債臨行債主同到任所以一取十宜出榜申禁其假託姓名誑騙財物者事覺問罪枷號部門三月發烟瘴地方充軍詔從之

二十一年正月定軍犯族屬分別同異籍之例

時以妖言人犯例應全家烟瘴充軍中有疎遠族屬無辜受累詔所司勘實仍令今後坐全家充軍者除

謀逆不限籍之同異外其餘罪犯戚屬各居異籍者
並與分謫

孝宗弘治十二年六月令問斷遷發罪人有自願本地
充軍者聽不欲者仍口外為民

時御史王哲奏遷發口外為民者風土不宜往往疾
病道死請今後兩廣及雲貴四川福建犯應遷發者
悉改撥本處附近衛所充軍部議以充軍之罪甚於
遷發令聽其自願從之

金匱要略卷一百三十四
十七年閏四月定強占屯田遷發之例

占田五十畝以上者軍改發邊衛民遷口外從給事中楊禴請也

五月定老幼廢疾犯罪充軍例

三法司議請年七十以上十五以下及廢疾人真犯死罪者奏發充軍徒流以上合充軍者本身自犯聽收贖有壯丁者主使者罪坐主使之人奏上報可

八月定天文生犯軍罪例

凡習業已成者發附近衛分充軍仍於欽天監應役
未成者如例發邊衛充軍

世宗嘉靖三年十一月詔今後除叛逆緣坐外凡減死
充永遠軍未遣而死獄者俱免勾補著為令

後十一年九月刑部言充永遠軍未遣者本犯死或
又逮其子孫視死刑反重近嘗奉准開釋而在外有
司或未諳曉吏得緣以為奸請通行申諭凡法當永
戍而未發遣病故者不必逮其子孫從之

六年七月更定充軍之制

御史楊彛奏凡罪應充軍者請勅所司從宜編發遠
不過三千里程不過一二月無使軍人走死解戶貽
累部議從之後二十九年五月給事中俞鸞又奏比
者邊事孔棘軍伍空虛與其投生人於必死之地不
若少寬其法因而用之夫今之充軍罪犯除附近之
外不過曰邊衛曰邊遠曰極邊而已南北地里不過
曰本省隔省再隔省而已以罪之輕重權地之遠近

邊衛可以本省擬配邊遠可以隔省擬配極邊可以再隔省擬配如內省無邊方者可以隔省附近邊方擬配邊衛其邊遠極邊亦可依類遞配庶解者易至逃者易勾而有司亦便於遵守部覆從之

二十年十月詔有私以首功相鬻者不分受財與否俱充軍著為令

二十二年二月定偽茶謫戍例

時戶兵二部議自今犯偽茶五百觔以上者本商與

轉賣之人俱謫戍近衛原係近衛者調邊遠主家匿
偽茶至千觔以上者亦依前例編發其不及數者比
私鹽律請著為令從之

神宗萬曆十二年五月定貪官計贓論罪條例

先是以溫州知府貪酷狀下御史問引因公科斂所
屬財物計贓以枉法論發充軍至是都察院以所引
受財枉法之例而所犯則係因公科斂之贓似與例
意有間緣科斂罪止徒而贓多情重者恐無以示懲

故引前例乞纂入問刑條例部議贓至五百兩以上者即引枉法例若止因公科斂第依律議以雜犯絞罪準徒帝從之

欽定續文獻通考卷一百三十七